

**Nuna tamakkerlugu Aasianni inuussutissarsiornermik ilinniarfiliortoqassappat pittaqaqaanik ajoqutaanillu nassuiaammik UPA2023-imi saqqummiusseqqullugit Naalakkersuisut peqquneqarnissaannik Inatsisartut aalajangiiffingisassaatur siunnersuut. Naalakkersuisut nalunaarusiornerminni ilinniartitaanerup iluani inuussutissarsiornermik ilinniarfimmik nutaaliorfiusumik nutaamik sanasoqarnissaanut pisariaqartitsisoqarnera eqqarsaatigissavaat.**

(Inatsisartuni ilaasortaq Kristian Jeremiassen, Inuit Ataqatigiit)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerinnineq**

Naalakkersuisut Inatsisartuni ilaasortap Kristian Jeremiassen-ip, Inuit Ataqatigiit, Inatsisartuni aalajangiiffingisassatur siunnersuutaanik qutsavigaat. Naalakkersuisut ilalersinnaavaat inuussutissarsiornermut ilinniarfimmik ilinniarfinnulluunniit arlaqartunik pilersitsisoqarsinnaaneramik misissuisoqarnissaa, matumani ilaatigut aamma nipilersornermut ilinniarfimmik. Kisiannili Naalakkersuisut isumaqarput misissuinermi nunarput tamaat isiginiarneqassasoq.

Taamaattumillu Naalakkersuisut aallartereersimavaat aallarnisaataasumik kommuninik oqaloqateqarneq, - aallarniutitut Kommune Qeqertalimmik, - periarfissanik misissuisoqarnissaanik nipilersornermik ilinniarfimmik nunatsinnut atuuttumik pilersitsisoqarsinnaanera eqqarsaatigalugu.

Kissaatigineqarpoq ilinniartitaanermik pilersitsisoqarnissaa sumiiffimmi avatangiisinut pitsaasunik il.il. sunniisinnaasumik. Tamanna ajornangippat pisinnaavoq ilinniarfimmut ilinniartitaanernullu pioreersunut allanut atatillugu, periarfissaqartumut sapinngitsumullu nipilersornermik ilinniarfiup nutaap ingerlanissaanik akulerussilluni. Ilinniartitaaneq nammineq immikkut ilinniakkamik aaqqissuussiviusumik pilersinneqassasoq kissaatigineqarpoq, aalajangersimasunik sammisassami ilinniartitsisoqarluni ilinniarfillu pisortaqarluni.

Kommuninik isumasioqateqarluni oqaloqateqarnerup nammineq siunertaraa iluaqutinik ajoqutaasinnaasunillu qulaajaanissaq, ilinniarfiup pissusissamisoortumik inissisimaffissaa toqqarsinnaajumallugu.

Naalakkersuisut ilanngullugu misissorumavaat siammasissumik tunngaviusumik ilinniartitaanermik pilersitsisinnaaneq, nunatsinni suliffeqarnermi pissusiusunut naleqquttumik siunnerfilersukkamillu. Tunngaviusumik ilinniartitaaneq misiligutitut aaqqissuussamik suliamik ilinniarsimanngitsunut suliffeqartunut inuusuttuaqqanullu meeqqat atuarfianeersunut kiisalu inuusuttuaqqanut immikkut siunnerfiusunut sammitinneqarsinnaavoq.

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi § 4 naapertorlugu Ilinniartitaanermut Naalakkersuisoq periarfissaqarpoq pisariaqartitsinermik tunngaveqartumik siunnersuisoqatigiinnik aamma ataatsimiititaliamik sammisamat tunngatillugu inuussutissarsiutinut ilinniartitaanernut suliassaqqarfimmi suliffeqarnermut inuussutissarsiutinillu ineriartortitsinermut atatillugu sulisussamik pilersitsisinnaanermut. Taamaasillunilu tamanna periarfissaasinnaavoq naleqquttoq misissuinissamat siunnersuummut

atatillugu, inuussutissarsiornermut sammisunik ilinniarfiit qanoq ittut tunngaviusunillu ilinniartitaanerit qanoq ittut pilersinneqarsinnaanerit atatillugu.

Misissuinerit suliniutinut aqutsisumit - projektlederimit – ataatsimiititaliap sulineranik ilalersuisussamit ingerlanneqarsinnaapput.

Tamannalu tunuliaqutaralugu matumuuna Naalakkersuisut allannguutissatut siunnersuut imaattoq saqqummiutissavaat:

**”Inatsisartut aalajangiiffigisassaattut siunnersuut, Naalakkersuisut peqquneqassasut nassuiaammik UPA 2023-mut saqqummiusseqqullugit, iluaqutaasinnaasut aamma ajoqutaasinnaasut pillugit nunamut tamarmut atuuttumik inuussutissarsiornermut ilinniarfimmik nutaaliorfiusumik pilersitsisinnaaneq pillugu.”**